

৫ বছর লড়াইয়ের পর টিকিটের ৩৫ টাকা ফেরত পেলেন ট্রেনযাত্রী, টাকা পাচ্ছেন আরো ৩ লাখ মানুষ
নয়া দিগন্ত অনলাইন ৩১ মে ২০২২, ১৭:২৫

ট্রেনের টিকিট বাতিল করে দেয়ায় ৬৫ টাকা কাটার কথা ছিল। কিন্তু কেটে নেয়া হয়েছিল ১০০ টাকা।
অতিরিক্ত অর্থ ফেরত পেতে পাঁচ বছর লড়াই চালিয়েছেন এক ব্যক্তি। অবশেষে জয় হলো তার।
অতিরিক্ত ৩৫ টাকা ফেরত পেলেন তিনি। শুধু তাই নয়, টাকা ফেরত পাচ্ছেন প্রায় তিন লাখ যাত্রী,
যারা একই অভিজ্ঞতার মুখে পড়েছিলেন।

কী হয়েছিল ঘটনাটি? ২০১৭ সালে এপ্রিলে দিল্লি যাওয়ার জন্য ট্রেনের টিকিট কেটেছিলেন রাজস্থানের
কোটার বাসিন্দা সুজিত স্বামী। যিনি পেশায় ইঞ্জিনিয়ার। তবে সেই টিকিট বাতিল করেছিলেন। সেজন্য
১০০ টাকা কেটে নেয়া হয়েছিল। যদিও তৎকালীন নিয়ম অনুযায়ী, ৬৫ টাকা কাটা উচিত ছিল।

কেন অতিরিক্ত টাকা কেটে নেয়া হয়েছে, তা নিয়ে তথ্য অধিকার আইনে (আরটিআই) মামলা
করেছিলেন সুজিত। সেই আরটিআইয়ের প্রেক্ষিতে উত্তর রেলওয়ের পক্ষ থেকে জানানো হয়েছিল,
৩৫ টাকা ফেরত পাবেন। সেইমতো ২০১৯ সালে ৩৩ টাকা ফেরত পেয়েছিলেন। গত শুক্রবার
বকেয়া দু'টাকাও পেয়েছেন। যিনি পুরো টাকা পিএম কেয়ার্স ফান্ডে দিয়েছেন। সেইসাথে প্রতি বছর ১০০ টাকা দিয়েছেন।